

頌

天

臚

筆

頌天臚筆卷之六

吳門布衣金日升茂生彙集

贈廕二

贈太常寺卿魏公

公諱大中字孔時別號廓園浙之嘉善人舉萬曆丙辰進士性狷介爲諸生貧甚居湫巷數椽不蔽風雨舌耕不足以自給妻子怡然負笈從景逸先生游己酉舉于鄉家人偶易新冠緜衣公自會城急歸毀之所司旂額俱寘弗張及計

偕同鄉仕郡邑者例有所干及公獨謝絕其餽
卷資亦力却不受爲孝廉六年未嘗輕謁官長
迨第禮闈恒徒步從一役觀政遠則跨驢任行
人每奉檄遐征力減厨傳程贈嚴絕寸絲考最
入工垣搏擊無所避權貴歛手要路多鮮衣華
屋公不能辦僦值就敝室寓從不携家惟平頭
二人圖書數卷朝夕蔬食而已踰年高邑儕鶴
趙公爲大冢宰知公清操卓識因每事咨公公
所薦引皆海內人望了無所私然忌者自此叢

焉歲癸亥轉禮垣時乞卹贈者濫甚公引會
典悉裁之忌者益怒甲子晉首垣長以激揚流
品爲已任發露餽遺仕路益肅或借汪文言事
劾公

先帝初寘弗問無何公與楊左諸公首擊逆璫
南北各衙門交章應之尋值晉撫員缺廷推謝
公應祥故屬佳品然出高邑意公不知也忌者
復揣摩彈公蓋以謝公曾令公邑首拔公耳璫
從中構之得

公三月廿三日 卷六 一 魏都賦序
旨降調旋逐趙高二公正人之禍由是如火燎
原不復可收拾矣乙丑夏璫矯

旨逮公是日雷電交作風吼水立士民擁公泣
送者數萬人郡邑長咸涕下氓隸莫不掩面逮
至下鎮撫獄榜掠備至誣賊三千三百金公歷
官十年貧不減諸生時五日一訊訊加全刑雖
戚友捐助頗衆卒不能如額竟死獄中嗟乎公
每疏欲辟楊熊而反坐楊熊賂以死不亦白日
晝晦哉諸慘酷狀詳魏孝子與潘茂先書中後

一年

今上御極璫敗伏誅公寃稍稍白又一年寃乃
大白贈公今官錄公孫允柎入冑監柎孝子學
泚子蓼洲周公婿又一年其同門友陳祖苞爲
之傳

吏科都給事中魏大中題爲合詞請納憲
臣之忠以除逆璫疏

臣聞從古君側之惡非遂能禍人國也有忠
臣不惜其身之危以告之君而君不信乃始
至于不可救耳今東廠太監魏忠賢擅威福
制生殺一殺王安以立威于內廷一逐劉一
燦周嘉謨王紀等諸臣以立威于外廷一日
而逮三 皇親之家人立枷而斃以立威于
三宮結奉聖夫人客氏在

皇上之左右縱私人傳應星陳居恭傳繼教等
出入禁地交通外官因以餌其所喜而翦其
所忌人怒于下

天怒于上輿情不勝憤憤顧未有悉數其罪于
皇上之前者憲臣楊漣受

先帝之知圖國士之報每念

皇上聖明中外多故苟捐吾身而可以有益于
君不難以其身死之誠見稔惡顯禍在

皇上蕭牆之內肘腋之間故列忠賢二十四大

罪以告疏

聞之日道路喧傳人情歡喜以爲今日而禍本
可拔也乃漣疏未蒙發票而忠賢之疏先下
念其勤勞錄其小心矣又明日而漣疏始下
沒其忠愛罪其沽直矣忠賢種種之罪案引
爲親裁而代其任咎忠賢種種之逆跡不能
置辯而代與分割安排布置倒行逆施自疏
自票疑盡出忠賢之意與爲忠賢代草者乎
恐楊漣之疏格而不達

皇上未及省覽也如

賜省覽無論違

祖宗之制干外廷之政出入警蹕僭擬乘輿
諸不軌不法罪在不赦即就疏中所列風聞
三事 懷冲太子何以不育 裕妃何以革
封

皇上南郊之日 胡貴人何以無病而暴卒設
深宮邃密之地果如通國之所驚疑是
皇上身爲天子而

三宮列嬪盡寄性命于忠賢與客氏之喜怒危
如朝露能不寒心

皇上又以宮壺嚴密外廷何以透知詩曰鼓鐘
于宮聲聞于外枚乘曰欲人勿知莫若勿爲
未有有其事而不傳之千百之口起中外之
疑者歷稽史傳備述甚多况忠賢客氏之私
人出入無忌一人出口千耳傳聲何可掩也
皇上何難割于忠賢何難割于客氏至謂左右
屏而

皇上孤立于上夫

皇上一身天地覆載

祖宗式憑百靈呵護臣民擁戴何藉于忠賢若
忠賢一日不戮客氏煽禍合謀恐左右之人
盡忠賢客氏之人

皇上真孤立于上其中莫可爲仗耳且忠賢惡
貫滿盈罪狀昭著陰令司房傳養貞藏奴酋
之奸細韓宗功于家欲以何爲

皇上即不能疑忠賢忠賢不能不自疑不能不

自危危之疑之極自作不靖釀變發難非所
悉言斯須不斷禍不旋踵伏乞

皇上納憲臣之言按忠賢之罪籍其家以佐遠
餉斥客氏就外居住毋令復入 宮掖滋其
兇穢下傳應星陳居恭傳繼教于獄治其內
外交通之罪并

勅法司嚴鞠傳養全之罪提究窩主以自爲
宗社計天祚

聖明揆地濟濟必無焦芳李東陽者廁于其間

謝遷劉健不失臣節而共事固有什百者濟
危扶顛瞻仰此舉無徒令羣臣惕號于下
聖主真孤立于上而莫之肯憂也

天啓四年六月初五日上奉

聖旨這事情屢有明旨如何全不遵奉皇長子
連日用藥朕心焦煩乃紛紛激聒全不仰體
豈是臣子分義且宮闈邃密何得妄生猜疑
好生逞臆瀆擾本當重處念係言官公本爲
首的罰俸五箇月其餘的姑不究該部知道

朝審紀事 天啓四年

大中未見錦衣衛原疏跪聽

嚴旨似坐大中以受楊熊之賄也楊熊之賄必
不投于口口欲辟楊熊之人大中初入工垣
一疏再疏三疏四疏所以爲楊李請劍者具
在

御前亦具在人人耳目也洎甲子 朝審聽獻
諸公以遼左失事諸臣於樞輔遠累臣疏奉
有姑待不死之

旨囚單概傳候

旨讞畢法司吏持簿秩序畫題次至大中大中
不可大司寇喬鶴翁離坐大中亦出離坐諸
公咸起離坐大司寇叩大中所以大中曰堯
曰宥之三臯陶曰殺之三老先生今日之臯
陶也大司寇曰畫題了商量大中曰商量不
畫題大司寇曰如何商量大中曰若大疏將
遼左失事諸公列其罪狀原屬情真獨以新
奉

恩旨故云候

旨則晚生書題矣若併其罪狀溷從末減則封疆事急議赦非時今日書題他日復有異同不便時御史大夫高景翁領之冢宰趙儕翁云不畫再商亦可大中因揖兵垣羅心華刑垣顧若虛兩掌科云此事六垣當有公疏論封疆當首兵垣論刑名當首刑垣又揖顧若虛掌科云今日似貴垣爲政顧若虛許之始散已而顧若虛劉鷓岑兩掌科復至大中寓

屬大中起草會十三道亦有公疏法司疏上
尋持常律如初此當日 朝審始末也姑叙

聊畧與天下萬世公質之辛酉年楊李奉

旨從寬議處矣而大中力持之甲子年楊熊奉
旨姑待不死矣而大中又力持之是爲受賄人
否

附詩

廓園

乙丑夏五二十日宿睢陽雷雨徹宵砌葵
俱仆曉霽葵起有翹然向日之意感而賦
此

祇此生來一寸丹風風雨雨恁摧殘傾心不信
天長夜霽曉團團仔細看

乙丑夏五二十五日宿奉聖禪院用辛酉
舊題韵

題墨當年愧碧紗重過今日鬢生華天生如此

人誰料臣罪伊何願敢奢果不鑒臨惟有死縱
然歸去已無家能垂勺露寬於海好好朝煙與

暮霞

魏孝子傳略

錢士升曰魏孝子諱學泚字子敬嘉善人邑庠

生其尊人爲吾友孔時

即給諫諱大中

嘗孔時被逮日

天大雷電風吼木立邑中聚而送者千人子敬

徒跣攀號欲隨侍以北孔時曰覆巢有完卵耶

父子俱碎無爲也子敬乃微服間行尾緹騎刺

探起居比抵國門邏卒囚布則變姓名匿旅邸

中晝伏夜出與二三道義商萬死一生計而獄

益急榜掠益毒子敬度無生理欲搥登聞鼓上

書自刎闕下已念徒死無益且萬里孤魂邈邈誰托于是匍匐飲血扶襯而歸歸而朝夕號咷未嘗入寢室哭而病病復哭每至丙夜淚盡而舌爲枯家人以漿進卻之曰詔獄中誰夜半而進之漿者竟號咷至于死歿三年

今天子改元剪除大逆昭雪孤忠孔時得贈太常卿予廕賜謚而吾鄉同志又以子敬殉父事疏聞于是孔時父子忠孝大節皎然揭日月而行天壤嗟乎人患無死所是父是子死可矣子

敬有詩文若干卷余正襟讀之涕洟感歎而不能已也語云志士仁人有殺身以成仁古來忠臣孝子舍生取義未有不定志而能引決一時者也志定則氣不耗氣不耗則骨堅彼其焦膈中先已植確乎不拔之根一遇事變本念割然生死貪怖舉不足入其舍而後初心快足而無憾于敬少稟異資沉研理學漁獵千古該洽淹通凡義利貞邪之辨斬然若別黔皙每遇古人奇節輒掀髯起舞觸羞恥事則裂背唾罵斷斷

不休觀其叙浙忠跋短歌曾中之所存可知矣
故當其蒙難間關以孱軀出入千鋒萬鏑中人
疑不瘁死即悸死顧反不死比其歸也交知且
悲且慰欲留其身以待天定而至性所迫必即
從地下以爲快父存則不獨死父死則不獨生
斯子敬之志也子敬生平不可一世獨父子切
劇同堂商推以爲笑樂而子敬淵識沉幾輒有
以濟孔時所不及甲子秋諸賢柄用雄艷極矣
子敬心憂之曰無根之華其能久乎寄書孔時

極稱閒居樂志以爲諷已孔時罷遠向余舉感
曰豈不懷歸顧勢不能獨潔耳嗟乎啞人吞藥
此苦誰知然而子敬之識深遠矣古來一門忠
孝惟卞氏眡盱隨父赴難而文采不表見顏忠
節之死常山也泉明從幽州轉徙流離至河北
購父屍見刑者言死時先斷一足與袁長史同
瘞一坎指其域得之護柩歸葬長安時稱其孝
然不聞以身殉也子敬荼苦似泉明捐生似眡
盱而其議論文章卓絕奇瑋足以副之求之古

人邈焉鮮匹嗟乎寅卯之際名教猶披謁者有
兒須眉無父亂賊相接踵矣惟是詔獄諸公凜
凜生氣孤行于清虛寥廓間而又得死壽之子
敬爲綱常維一綫詎非忠貞之羽翼春秋之功
臣哉先是有里人夢孔時藁葬地忠孝坊額金
書煌煌覺而異之時子敬尚未死也浩氣塞宇
宙至行通神明蓋不待

聖明褒恤而機兆先露矣豈非天哉豈非天哉
是爲志

錢茶曰昔咸和之世卞氏父子同日赴難其母
撫屍哭曰父爲忠臣子爲孝子我復奚恨讀史
至此每歎忠孝易得而萃自一門者甚難且鮮
屈指我鄉如王忠文死于使孫忠烈死于賊于
忠肅死于讒沈青霞死于諫其後人皆振振有
聲海內稱孝子馬然則未聞有號慟而死如我
子敬者子敬才極高邃于理學性至孝英氣蓋
發辟易千夫八歲時墮橋足斷瀕死終不作呻
吟聲惟臥讀陶詩以爲樂當其舞象之年便解

脫生死如此弱冠與余同研席風雨短檠朝昏
相對我兩人蓋歷十年所也始稱文字交既而
相與訂性命之學已復以名節相敦勉其言曰
天下漸多故矣死忠死孝便是了生死故余錄
浙忠子敬序之余歌死事子敬跋之凡于貪怖
之根歸全之義宣闡婁至聲淚俱惻粥粥乎若
惟恐七尺爲已有而子敬果以孝死矣先是甲
子春筲羽盈朝先師大直聲震闕下海內皆仰
望澄清子敬獨私憂曰物不可以終通天其或

者蘊崇正人之毒而速之感與未暮闕禍大作
子敬括髮徒跣侍先師以北欲上緹縈之書而
登聞不可擊欲圖李嵩之報而肘掖不可問晝
伏夜號百荼備茹七日之淚空碧聊城之誼邈
然嗟乎子敬安得不死比其負骨歸也屏妻子
而不見撫遺鬣以烏烏旦暮哀吟丙夜不絕童
子捧水漿以進則覆而泣曰我父獄中安所得
盃水平病且革進以藥餌則又覆而泣曰吾父
獄中更安所得藥乎如是數十日而子敬死矣

假令子敬不即死忍死以俟今日泣血叫闕鳴
父冤暢遺緒購取仇人頭馳祭先君墓道前豈
不稱孝然子敬終不能頃刻待者此子敬之至
性爲之也經有之至德爲道本至孝爲行本五
品之屬各有其至苞焉然貪怖根深則君仇不
報父難不殉甚且舉世天闕衣錦食稻甘作無
父之賊子嗚呼百年鼎鼎同訖于盡與其病死
羞死唾罵死孰若忠死孝死之爲不死也雖然
才如子敬使之挾策人主之前稱先王而道古

昔三公四輔茲實其選即不然秉其瀕華之性
出而經營四方抱桴鼓捍大敵亦必能爲張睢
陽之嚙齒露齧顏平原之握拳透爪惜乎其竟
以幽痛死也今子敬雖死而其孝烈之狀與處
師之剛風千仞靡不表著朝野炳于丹青且其
弟子一氏濂學又復讀書好道克肖父兄千秋之
業豈卞氏父子所能彷彿萬一哉子敬有集余
爲詮次及被難後諸牘收拾遺文期于可久此
固後死者之責也亦忠於子敬之道宜然也

魏孝子

家書 甲子九月

莫赤匪狐莫黑非烏景象宜屬衰颯而一時碩
彥盡居雄艷之地天欲以此開中興邪抑將蘊
隆正人之禍而速之隆也年例之處于法不爲
甚刻而世情已極難堪每想公子虔杜門不出
可爲寒心外計黜陟結怨尤衆方今郡國長吏
率多以墨聞者而其心又鮮不銓諫自擬稍拂
所欲便已切骨更不待重處也趙冢宰旣辦霹

靈手肅清百辟端在此舉豈得復顧一家哭但
秉心無競者耳目欲聳威焰欲平柴子羔別人
而有愀然之色此意斷不可忘耳

答當路書

權奸之禍人國也有攻其初者有攻其中者有
攻其杪者三者品識材智本相敵而候有險易
其留聲實于當世也亦遂殊攻初者力不費而
大愿除蘇文忠所謂奸之未成臺諫折之而有
餘者也攻杪者際天怒人怨之極奮然爲天下

報警國狗之斃亦惴惴虞其嚙也而兇鋒崩潰
勢則險而功易成獨攻中者不勝憤懣之氣且
萬死以與之鬪而一擊不中肉骨糜爛追咎者
亦即多方訾之謂實乖舛節奏以至于債嗟乎
攻奸猶用兵也流矢橫飛不避智勇雖韓白敢
自必哉而當其捷則盡掩天幸而悉歸人謀當
其覆則竒跡槩弗錄而舉動之紕繆乃特聞此
忠臣孝子所以仰天椎胸淚盡而繼之血也先
君之禍載籍所罕聞慘矣而門下光信之餘多

所未滿門下父執也豈可以面折含茹弗荅竊
又痛傷先君之志不白于天下也敬與門下質
之門下咎先君招權府怨招權者揣當塗之喜
怒而彊附焉因號于衆以爲市也癸亥冬先君
使竣見 朝趙冢宰遽扶疾命駕指膺曰此身
即子身也願勿坐視余當此時實愴然懷國士
之感避權者且得昧平生之可否而勿與言乎
冢宰徐釋之不欺漸稍稍行其言當此時避權
者且得禁制之使勿行乎冢宰立意獎恬最疾

夫配人與地而爲之請者而先君亦最恥爲人
營每一缺出四岳九官十二牧麋至先君獨無
信冢宰益心折聞憶平日之所可者而舉之諸
營者與代人營者咸怏怏却步恨事權一出于
先君不知冢宰所以深相向者正以不招權見
知非招權之說也即如謝公晉撫之擢禰樞也
先君實不與聞先君而與聞也則謝公清標鶴
立正宜內用之奚事出諸藩徼之地哉邈其禍
蓋本于禮垣當時 卹典濫極先君一切引會

典裁之屹然不可移一時要人以為是可以卸
怨也于是營缺者捧厚餽至輒語曰是不難吾
當圖諸魏事偶諧輒曰魏幾相厄矣吾力而得
之偶不諧則謝曰吾力殫矣其如魏何也盈城
要人爭借此以消釋天下之厚餽且誰與戶曉
之必欲避權自全計唯有悉效卸怨者之為耳
先君義弗為抑亦性弗習也至轉入吏垣則一
可一否本職懼存以焉尤豈敢為無權無怨之
言官哉門下又以為之急流勇退之義美哉斯

言先君所樂聞意者居禮垣時當退乎衆正嚮
用嘉言盈廷丈夫亦欲一吐生平耳告假歸去
俸滿徐來拾級而取京堂巧宦信有穩徑焉壯
士弗之甘也意者擢吏垣時當退乎甲子二月
程都諫將陞序屬劉弘化弘化于冬間即徵以
艱聞序當屬先君設此時循次而轉誰能訾焉
者而左公忽招阮大鍼使來先君弗聞也忽摩
阮大鍼使去先君弗解也大鍼去趙冢宰循次
陞先君先君何疚于心而必避之當日詣冢宰

固辭誠屬繇衷之請要亦禮進之道則然非可相責以義退也意者角傅榭時當退乎傅榭借汪文言發難嚼然之軀忽擠入千鋒萬鏃中文言事一日未明則一日宜止此正力戰之時也豈解去之時哉急流勇退獨文言廷杖後宜然先君束裝南駕決計歸田門下想親覩之諸同志以內外相距莫肯退尋尺一人潔身將通國闕然而盡散于是輿馬填寓門如室袁公揣去志不可奪特以計典爲辭具疏相留尋得旨

復羣然操大義相劫制而先君亦旋念計典且
近趙儕鶴陳中湛高景逸楊大洪鄒匪石程我
旋暨在袁諸公適列居人才進退之地誠舉貪
墨吏一大創之庶幾哉聲震天下而更援引廉
能吏爲他年碩果縱居位不久亦暫見平治風
嗟嗟此志誠不遂有心者似亦未忍厚非之也
門下謂文言纖人耳若之何與交文言橋汰已
甚喪其軀以喪羣賢誠大有罪焉然初番下
詔獄媚中貴者實請得而甘之幸脫意氣不撓

及再入獄鍛鍊兩月餘弗屈 詔杖一百其甥
悲失聲叱曰孺子真不才死豈負我哉而效兒
女子相泣耶未番下獄嚴鞠者四酷刑備加弗
屈最後不能堪始仰視許顯純曰吾口終不肖
汝心任汝巧爲之我承焉可也顯純誣先君脏
復蹙然起曰天平寃哉以此鑿赤貧之士有死
不承特爲先君受兩夾棍數百穿梭嗟乎匹夫
殉義水萬折而必東亦足愧簪紱之徒庸庸者
矣又何怪諸君子之惜之也門下又歎攻闈之

舉無應而妄發嘻誠然哉誠然哉楊公初入國門也疏已在袖中矣同志以無應尼之後見妬正者走閹竇如鶩而閹勢亦漸鄰于不臣遂不惜以身死之公疏單疏聯翩共起雖傳檄陳居恭亦莫不張吻內嚮閹蓋惶怖憂就縛矣而林虜一逃士氣盡喪首事者遂以無應蒙譏嗟嗟將俟九五爲應乎驪龍之睡正酣也將俟九四爲應乎則劉謝車覆後人方斤斤焉守許進之戒爲著龜不得已仍俟彼曹內應耳文襄權誦

固未可數數試也終不應終不發將遂鬱鬱聽
之哉門下謂萬元白死竟無繼元白者殊爲羣
賢羞嗜有說焉大覺旣開南北司訛言如沸林
內者曰蚤 朝將面奏林外者曰 官中事將
面鞠頗聞面奏之罪名驚 駕驚 駕則立擒
楊公方躊躇不輕發而內已深懼之一日蚤
朝羣衷甲以出氣息沛然甘露之變在旦夕而
一時冢宰所推次輔所擬內又且唯唯相奉以
求成故諸君子姑緩之鄉使持之益急必面鞠

尚面鞠

皇上必袒內不袒外外弱也將起大獄外疆也
或致急兵縉紳固因之塗炭 宮禁亦因之動
搖追咎者又未必不憾諸君子之過激也而門
下述葉福清之言曰其始也無虎豹在山之勢
其旣也無鷹鷂搏擊之威福清無此言也則已
福清有此言也則身爲正卿委蛇中立殺正人
者非公其誰不任責而責人多見此叟之巧于
脫也門下又謂高公疾惡太峻非克容人者而

先君固推之失宜昔宣德中顧佐爲御史大夫懲貪污御史數十員臺中股栗天下最不能容人者莫顧公若也而蕩滌穢風卒贊

宣宗之治當代有若人門下顧不快邪且救世之道用賢去蠹而已用賢必用賢之尤去蠹必去蠹之巨擯高公弗進留貪污御史弗黜而以爲時中恐時中弗如是也更謂趙高兩公之于先君也遞亞爲師生當避嫌避嫌之論中人以上所不談師生也而故庇之師生也而故阻之

曖昧正相等耳又謂高公本力辭曷不善成之
薦賢者但當策其能不能不當叩其願不願御
史大夫將用以彈壓百僚者也不使不願者居
之將使願者居之哉門下謂外魏誠奸讞然失
儀細事耳何遽以此逐之夫宰相失儀細事也
臺諫糾儀遂獨爲怪事邪事涉 宮禁旣曰大
事也不宜言事涉 郊廟復曰細事也不必言
必如是直有不言而已矣門下謂究問時盍慷
慨罵賊死而靡焉誣服何居嚴鞫之日門外邏

卒以千數抗辯與否門下何自聞之微傳左公語所親曰彼殺我有兩法乘我之不服而亟鞫以斃之一法也陰戕之獄中徐以病故聞一法也若初鞫輒服便送法司旣到法司更無死理脫詔獄而後圖之果爾則諸公誣服未始非一策也至仍着鎮撫司追比則外魏亦且自言其壞法矣良平豈能料之哉嗟乎狄梁公承反而不死人服其智諸公承受賄而死人笑其愚殆有幸有不幸焉或亦未易議也門下謂追比

肯下何不死嗟乎貞臣烈士皎然與日月爭光
亦唯一死結局耳豈堪如是求多哉文信公入
元豈不自分必死顧徘徊數載始就戮燕市中
假令當時有求多者引繩披根不休信公殆不
得此人數今視信公竟何如也昔鄒志完得罪
謫嶺表人作玉山主人對譏之謂爭立妃者當
爭之廢后之時每讀史至此輒憤然不平人方
顛沛萬里之外而更駕高論以壓之使併不得
有其名不亦刻乎或于伊川前譏志完好名伊

川曰人當于有過中求無過不當于無過中求有過嗟乎仁人之言藹如固與苛求者各一轍也獨念志完一人耳而譏好名者罪其激玉山主人罪其懦貞臣烈士之不見宥于人也蓋久矣悲夫

上張年伯書

老父見邸報而西也寂然無所言泚等因問可以乞援者何人輒笑曰死而死耳何援爲將就檻車泚等號泣固請附耳道老年伯姓名泚恨

不得奮飛至前若崩厥角稽首而徒跪入都聲
息日很厥卒之羅紵甚密長班之口舌易騰深
懼彼此交累空失所倚嘗從馬上望見顏色淚
汪汪欲墮而不敢出聲也今事急矣能索矣不
得不大聲而疾呼伏乞臺下垂聽焉老父以辛
酉入工垣值楊鎬等得從寬議處之 旨四疏
力爭幾見唾于羣喙甲子入吏垣值熊廷弼等
得待以不死之 旨朝審之日堅不畫題此皆
昭昭在人耳目者而一生欲殺楊熊竟坐楊熊

之賄可痛也室懸如磬逋積如山無端坐三千
三百金若肯降 旨籍沒固所欣然樂從者而
刻日追比必欲產外取盈焉天不雨金金安出
乎可痛也它家或待南北信通便可接濟寒家
即朝往夕來庸有濟乎况往三千里來三千里
縱父老憐而圖我而艱辛措處計所費時日亦
三千里南中信至老父死杖下久矣可痛也勢
不得不告急于輦轂故人而有心者無力有力
者無心縱叩頭頭碎屈膝膝碎曾何能出父于

湯火嗟乎窮哉舍臺下更誰控乎使老父一生
志行稍有不足見憐于鬼神者泚今日亦不敢
以累君子而老父之負罪實薄抑使一時汗纈
更浮三千三百金之外泚自度籲呼無路惟有
眼看父死以自剄謝父已矣而老父之坐賊適
輕罪薄既足傷仁人之心賊輕尤可壯義士之
膽惟臺下速圖之學泚雖孱怯乎每聞古忠孝
節烈事未嘗不慷慨流涕奮身欲往而今竟藏
首藏尾曾縱縈之弗如者誠謂徒死無益專欲

留頭願爲報恩地也詩有之買絲繡作平原君
有酒唯澆趙州土今日之控非特秦庭七日哭
也熱血萬斛悉灑向老年伯衣裾矣謹反首拔
舍以待命

上黃虞兩年伯書

喘且絕矣兩年伯嗟而續之宜何如五體投地
而侄出口無愧色入手無感辭誠以恩越尋常
不用求亦不用謝惟默默焉鉢諸焦府死報爲
期此朱亥不拜信陵君意也不數日而喘之續

者且復絕爲之柰何舊創未合新創復開獄內
既恐不能活而五日再比每比限數百金獄外
將何策應之絞腸達旦亦思別覓生路以暫寬
兩年伯之拮据而謁鬼見帝百不一投縱具拜
人之膝誰則受我唯兩年伯終救之任四支徒
存七竅盡塞唯有張眼望恩翁眼悲泣而已但
願視老父千死萬死一分未必死之人而視任
則直如既死之人唯視爲既死之人然後絕意
于其子唯視爲未必死之人然後不絕望于其

父譬如人有急疾瀕死者屢矣扁鵲惠然許之
曰可生而其子夙以癱瘓廢則病夫死不死乃
扁鵲之責非廢疾不足責者之責也臨楮叩頭
痛哭

寄潘茂先書

淮安舟次

古權闡之殺貞良也以什伯數有死貶所者矣
有死獄中者矣有死杖下者矣有死東西市者
矣若乃纍纍然列跪奸弁前訶之詬之裸體辱
之弛柙則受拶弛錄則受夾弛梭與夾則仍載

鐐杻受棍疊棍所中結爲黑丁黑丁漸漸陷爲
深坎深坎上微裹藥傳焉不再宿復加榜掠藥
裹爲棍揭去棍棍擊赤肉肉敗蛆生淋漓零落
肉墮堦墀者塊如碗當此時寧特無力圖生蓋
亦無力覓死矣而垂逝之日更嚴刑促之滌暑
殷雷 旨故遲遲不肯降越六七日始出尸牢
穴中骸漲而黑面與鼻平入殮時不忍復道嗟
乎悲夫足下讀書萬卷亦曾有慘毒如斯者哉
先子刻苦一生併四壁亦非我有而竟坐賄三

千三百金以死口口欲辟熊楊諫草傳天下而
竟坐熊楊賄三千三百金以死汙嘗中夜環走
想極成癡謂此時忽有人焉以三千三百金相
貸如期以進如數以輸彼縱意不在賍當用何
名見殺苟得出 詔獄入法司父子相抱一慟
俱斃斯亦人生之極歡也而長安故舊自一二
人外率視我如疫鬼間扣之輒使人從門縫中
辭曰目與目相射也明日可暮來如期往關人
則厲聲叱曰睡熟矣敢相溷耶明日可蚤來黑

夜匍匐惴惴恐死邏卒手而訖不得一見倖見
矣不過攢眉誠曰慎之予豈俟鳴者幸毋數數
出也久之卒亦無所聞嗟乎悲夫開口告人非
難無人可告之爲難也屈膝拜人非難無人可
拜之爲難也獨范陽長者焦然倡醵金之議滌
鄉酷貧之士素不通姓名者莫不賣服物以相
應然多者不過十餘金寡者乃至大黃錢三四
文伯夷有難豈於陵陳仲所能救哉信乎廉吏
可爲而不可爲也廉吏可爲而不可爲者猶謂

妻子貧困已耳今則受賅鬻獄罪延其孥反似
貪吏可爲而不可爲不更寃哉已矣追比方始
泚將就浙獄矣先子生存猶爾爾先子死有敢
出而援我者乎縱幼弟躑躅于獄門老母行哭
于道路義士或有矜恤者顧昔不能活父今以
自活泚猶痛之嗟乎悲夫司馬遷羞貪賤輕仁
義頗亦謂謬于聖人今而知其言之恫也貨殖
庸可無耶游俠庸可無耶刺客庸可無耶先子
死當葬首陽山側泚若死自思葬要離墓傍耳

天地鄙陋莫可共語昔檻車發平望高子嘖嘖
奇足下不置僑良鄉賓客僣從俱似遙領足下
意者扶櫬南返適又久與程君偕述才人經緯
甚悉慨然嘆足下真英傑也拔血而告之哀

辭里中父老書

嗚呼先父之被逮也邑中送者數萬人攀舟宛
轉哭聲動天旣行後又承十二坊居民設醮痛
念此恩無可爲報指望生入城門與父老歡然
一笑也而今竟休矣痛忍言哉扶柩南還又值

里遞計產醮錢泚驟聞之驚怛無地先父于七月初三日從獄中寄片紙云臨行時百姓許槩縣派賠萬萬不可我窮苦一生並無分銀粒米施及鄰里鄉黨今日之禍又非爲合縣公事豈可相累嗚呼手書現存可出共視泚忍背遺命而妄受乎况父老哀憐先父猶念素行耳至如泚者侍生父而往侍死父而歸庸懦不孝父老正須箠殺何愛而欲活之目今公差來捉旦夕將死家門傾覆無復可言所貽破房一所零田

幾畝求父老勤人買之苦湊幾兩完納以領老
母救子之恩微產旣盡終須一死泚自無錫別
父後來不得一見晝夜痛苦只想地下相逢父
老不須悲傷也但身死之後兩弟決難自存送
不能葬母不能養願父老清明寒食過塚前澆
一杯飯時時以衣食周老母飢寒是則泚所求
耳酥錢之賜萬不敢當謹辭

贈太僕寺卿周公

公諱朝瑞字思永別號衡臺山東臨清人中萬曆丁未進士初罹璫禍者六人而五人皆丁未論者謂是科得人爲盛云公初任中書舍人選爲給事中與同官楊漣最善議論相壅篋光廟時公疏請蠲免金花千

聖怒外謫天啓初召還省會東西交變傳旨暫停經筵時公在禮科疏請及時講學語侵近侍有借叢指鹿等語魏客輩深恨之乙丑汪

文言獄起遂逮下鎮撫初奸黨撰東林點將錄以示魏璫曰此錄中一百八人皆結黨謀欲殺祖爺者也魏璫酷信其說命諸奸先擇其尤者十人逮之名已定矣諸奸復推敲者數晝夜遂降 旨先逮六人而公與焉蓋此六人非但鯁直爲逆璫所恨兼有才智爲奸黨所畏謂先剪滅此則餘皆發蒙振落耳則公之才品可推矣公坐贓一萬竭貲稱貸不兩月而告竣意謂出獄有期忽一日與顧大章及孟弁共飯時楊左

魏袁已死獨二公存耳獄卒急呼公獨出頃之
已報公畢命矣

今上御極贈公太僕寺卿廕一子

禮科給事中周朝瑞爲時事多艱正資勤
學乞仍照常講學以光 聖德以慰人望
疏

臣聞帝王之學與韋布不同非但尋章摘句
而已治亂之理揆及于文方講究明而後推
行力是以自昔英烈之主雖于戈搶攘之中
猶于馬上讀書彼誠有鑒于不學墻面所關
于軍國利害不細繇此言之

皇上值清晏之日學之所重惟是涵養性情當

之 旨果自

聖意乎抑閣臣實先意逢迎欲假

聖旨停之乎若

聖意倦勤蹈此杳不聞聲之覆轍閣臣宜引義
力爭何待人言之畢如其閣臣阿中涓意實
有先言遂叨 中旨閣臣亦讀聖賢書豈不
聞人主宜使務學接見賢士大夫况

皇上冲齡志氣未定即一二親信內侍亦不明
乎天下安則

皇上安而若輩亦安種種借叢皆堪覆 國獨

有 朝講不輟諸臣尚得睹

皇上龍顏庶幾有牽裾之忠猶可白指鹿之伎
今三六九日常朝已漸借題傳免倘并 經

筵日講一槩報罷羣下隔 九闕無從瞻

日月恐將來司馬門之報格不以 奏呂太

防之貶竟不及知國家大事去矣豈但深居

鎮日言不及義學廢于嬉而德終罔顯哉伏

祈

皇上收回前旨急諭閣臣傳示中外 經筵日
講依舊舉行自後凡遇 常朝之日亦必振
起精神出見羣臣更願不拘常套虛懷下問
廣收羣策共濟時艱無論大小臣工惕于
皇上憂勤相率不敢怠荒即內外民庶見 朝
講不改常度亦且謂少年

天子尚有不廢說詩書敦禮樂而臨 御以時
吾屬何憂彼逆天小醜直可制挺撻之矣 臣
等備員禮垣見 朝廷失禮之大失策之甚

無逾此舉不敢從諛循職糾正統惟

聖明裁察

天啓二年 月 日奉

聖旨

贈太僕寺卿顧

公諱大章字伯欽別號塵客直隸常熟人父奉
常公雲程舉學子公長次公諱大韶字仲恭俱
有美才兄弟齊名翱翔菟苑公舉萬曆丁未進
士筮仕閩泉司理以疾去官越三載改毗陵學
博所獎拔多知名士癸丑任滿丁外艱丙辰服
闋補國博會仕路漸清正人日削公以下僚留
心世道人咸憚之戊午遷刑部主政詳閱罪牘
諸所讞決民自不寃全活百許人辛酉奉

命典粵西試時稱得人選

朝時福清與南昌有隙公調護甚力卒善南昌
之去然公爲

國家計實于南昌未識面也頃之廣寧失律太
司寇王公紀以大獄屬公公用諸君子議謂經
罪稍薄于撫袒撫者咸怨公先是王大司寇劾
客氏袒逆者咸謂疏出公手於是臺中有疏譏
公者公疏辨甚晰舉朝直之旋以疾歸家居二
年由武庫員外起調主客則魏璫大拜矣諸奸

合謀借汪文言獄詞逮六臣公遂與焉時公已
遷臬憲出

國門矣竟矯 旨逮下詔獄獄庭有大樹生黃
芝六瓣獄卒以爲賀公嘆曰芝瑞物也而困于
獄吾輩其終于此乎六辨者蓋識吾六人也主
者鍛鍊坐贓四萬五日二比備極楚毒身無完
膚前後受棍一百七十梭敲三百二十夾杠一
百四十五死而復甦者三有間發部會鞠復受
竹批二十又將復下鎮撫公嘆曰士不再辱遂

投纒而卒蓋在詔獄時即求死不得也嗚呼痛哉歲丁卯

聖天子御極公寃始白得

旨贈太僕卿厚加優卹焉

野臣曰古范滂李膺諸賢亦以拂璫死顧未有誅僂而兼籍沒慘酷如公輩者也公在比部全活多命乃竟得此奇禍天豈可問耶雖邀

恩卹有餘悲爾

顧塵容自叙

余自丁未幸第選閩臬推官時按臺缺撫臺徐學聚被論候代一切以情用事監司而下尤而效之余銳意政事遇事輒攘袂爭之爭而得者十之七然猶鬱鬱不樂得奇疾棄官歸家遇外家立嗣事頗任嫌怨卒捐外父所贈以明志家居三載改常州教授丁父憂喪畢見正人日就摧殘慨然曰昔賈彪不入顧厨之目卒西行以解其難余向與東林疎此正可以彪自况也補

國子博士頗爲世道効力人皆不知後以同事
詔其功余名亦漸彰爲人所忌矣戊午陞刑部
已未以便差歸辛酉復入則世局一新矣而南
昌爲相頗與言官構余托友上書勸其先收主
權則相權自重言路自清逆而行之者禍也南
昌歎息而不能用余旋以試事赴西粵歸
朝則壬戌春矣福清與南昌小嫌羣小浸潤之
余直言轉福清之聽卒善南昌之去然余與南
昌向竟未識面也去之日乃一謁之耳南昌益

歎息時廣寧陷重臣道將俱逮王紀爲大司寇
必欲以大獄屬余案之余已啓調儀司爲王所
阻時諸正人以經罪稍薄于撫余初亦從之然
不能堅也卒以此禍然禍源豈在此哉蓋自國
博時胎之矣羣小譖余于璫謂王紀攻客氏疏
皆出余手余無控峒之才而有其禍自此始也
釋奸細之假者而原叅臺省怒辨劄一獻非南
昌族辨修卜年非叛人而舉朝怒者十之七余
禍不可解矣是秋調兵部是冬有疏連攻余且

以奇禍中之者至癸亥夏得白告歸甲子秋調
起禮部余赴命北行而時勢大異矣亟求一臬
以出卒不免逮訊五毒備至同逮五人皆先予
瘐死予體稍強獨後斃在鎮撫百餘日已有
法司定罪之命

附詩

得北書

第大韶

貧病傷人劇利刃那堪原上鵲鴿號奸威凜
冽方魚肉家事紛挐更蝟毛四萬金錢真捉

影二三膠漆蓋驚清悶來漫詠唐人句無着
天親第一高

其二

寒江北渡試輕刀誰料狂風忽怒號無無數
圍齊解組幾人腹劍快吹毛奇禽共命多生
伴小鹿衝心半夜濤莫恠舉朝同結舌天顏
穆穆聽猶高

其三

落筆爭誇快剪刀中讒黑獄不聞號百番敲

髓攢諸毒一命懸絲惜二毛血漬半成庭下
土蒐飛頰向海中濤西曹自古論囚地却羨
西曹福地高

其四

鷓鴣落網近砧刀一步還聽一叫號豈但同
巢憐比翼也應異類惜奇毛朋儕閉戶愁沾
臆弟子更師怯避濤傳說對山能救我至今
俠骨九原高

次韻仲恭得北書

因以
自警

王宇春

敗絮行荆山慧刀頻慙師友疾呼號參苓齧
產供多病鬚鬢傷心盡二毛北闕清郎誰灑
血東山逐客尚驚濤岱遊幸脫生桑夢畢稼
休遲半百高

次前韻奉輓顧太僕 金日升

鬼蜮含沙剗腹刀忠寬猶自夜長號憐君平
獄衡中法拂劍空懷剪不毛羅織深文埋願
况姦雄亂國辱山濤咄嗟近事天難問青史
名垂斗岳高

喜聞 新誅次韻二首 顧大韶

詔使銜綸已在塗山隈海溼盡歌呼雷霆便
合誅元憖霖雨還須替佞儒鴈斷三年重拭
淚鶯鳴幾箇共提壺停杯徧向旁人問更有
長安信也無

一自妖狐據要塗豺狼魑魅互相呼彌天厲
禁搜東黨徧地崇祠逼魯儒快覩昇陽重擊
壤追傷夜雨且傾壺爲憑寄語奸諛道遠頌
元臣德政無

兵部武庫清吏司員外郎顧大章奏爲據
實剖明以待 聖明譴黜疏

臣通籍十六年爲曹郎五載素以拙宦自甘
謬謂守官無闕頃接邸報見雲南道御史楊
維垣一本爲百官宜杜私交之門等事內議
及臣謂臣倡八議之邪談緩頰而嚮大獄等
語事關法紀名節臣敢不剖心瀝血于

君父之前蓋自遼左失陷五年來封疆失事之
臣至今春而始盡逮奉 旨並下法司此刑

部山東司事也時本司官或以差出或以病
告虛無一人臣堂官王紀新任不察臣愚而
以委臣臣以福建司員外冒昧代庖自謂當
官而行何疆之有毋為首鼠規避也比時論
經論撫救經救撫之疏無慮數十揚之則九
天之上沉之則九地之下眾論不同之極致
舉朝聞且見之矣會勘者十三道十三司
兩寺共二十八人意見懸殊臣議謂誅心則
廷弼難末減論事則化貞乃禍魁頗亦自謂

持平卽臺臣所指入議之說不特臣有之亦
不特臣衙門有之全招具在想臺臣或未暇
竟覽也今諸臣並論辟矣毋論臣非鬻獄之
人且業已辟之又何鬻焉至謂臣宛轉美調
若以爲受廷弼之庇者似亦過矣臣久其冷
局何心求調吏部尚書張問達昔年爲臣堂
官謬被獎許今年三月欲調臣于儀曹業將
啓事臣堂官王紀動色阻之留臣于刑部俾
結諸大獄今紀雖去冢臣見在可問也越數

月而移兵曹謂臣因大獄得美調可乎若臣之罪則臣自知之矣年來職掌輕而議論重刑曹又諸曹之最輕者也以最輕之曹郎妄欲修其職掌浹旬之內定諸大獄府怨實多臣固不待今日而知有此也臣與堂官共定諸案堂官朝去臣亦當夕行濡滯數旬臣罪愈重臺臣之姑道臣也亦不爲不久矣伏乞皇上將臣罷斥以爲愚執不善處事者之戒臣雖永錮亦甘之矣臣不勝惶悚待罪之至

天啓二年十月十六日奉

聖旨顧大章奏剖旣明着照舊供職該部知道

兵部武庫清吏司員外郎顧大章奏爲臺
臣非理相加微臣不得不辯疏

臣因臺臣楊維垣數語誣臣據實剖辯已蒙

聖明洞鑒臺臣而稍存天理也者宜亦可以息
象矣今專疏橫詆穢惡滿紙臣小臣也大獄
一案雖蒙

聖鑒而粧誣多端誼合自剖據其所摘臣議單

中語臣亦何諱比時會問二十八人人各有

單議論不一臣單中諸語大率他臣所有耳

始而各出已見終而畫一成招蓋三法司共
議而定此辟臣曷嘗釋廷弼哉自弼起家以
至下獄中間薦弼議弼救弼罪弼者何下數
十百疏臣之单直正言其罪而斟酌于法之
所麗耳其詞視諸疏何如臺臣既細閱全单
矣獨不見同臺之单有分別遣戍等說乎廷
弼果有四萬之饋理宜不及于最輕之曹郎
矣臺臣既欲論職以揭附弼之榜樣又懼臣
明白悉數而預籍以妄扳他人之一語此何

心乎臣當官奉法詎論私交薦師何有况非
薦師臣承乏山東司諸累臣對簿後以奏稿
未成故堂官遲臣交印數日臣亦不願以臣
罪案累僚友也至誣臣諸獄盡鬻尤屬不根
花獻宸逃弁之小者耳登萊沈總兵遣之入
京總理三部王侍郎遣之出關未經到官者
也王一鵬林喬椿臣曾陪審而招不出自職
者也韓初命郭增輝臣所成招而審單臺臣
李時榮所定者也佟養冲去年五月舊臺臣

英應琦所批釋者也時臣方奉差廣西佟卜
年生平不識面不通刺者也又非臣經手事
也此諸獄者毋論臣不鬻即善鬻者宜何從
鬻之乃臣所親斷之獄即山東一司亦甚多
矣維垣何不請

皇上別勅刑部條臣所勘諸囚悉移獄于御史
臺今維垣一人精心剴決臣所斷有一不合
于法者臣請從鬻獄之罪臣昨年典試出堂
官黃克纘之開送臣誠不堪有資次徃歲告

病有撫臣徐學聚之代 題慰留盈積臣實
負之吹求至此何端不構乃至妻財有無亦
煩羅織用瀆

聖聽臺臣之爲此也亦勞矣反覆本疏臣竊自
疑據其說臣膽術謂無欲不遂是宜無籍于
累臣及其朝臣美調亦廷弼之薄報則所稱
膽術毋乃溢言乎爲臺臣再疏計者兩涉而
無當固不如熟思而致一也至津要非臣所
思職方人所共避捏砌事款已足殺臣拙墓

虛景更復何益臣觀維垣建白意與人殊即

其設挑激之機竄逐執法之名卿辨此一件

儘殼千秋青史縱刀俎一曹郎少報受恩深

處于西臺事業竟何辜毛損益哉思及于此

宜亦自覺其嚼然而無味矣臣之所辯據事

據理臺臣能以理屈臣甘受屈若徒恃勢

謾罵則

聖明在上公議在廷臣不受也臣小臣被言

理當靜聽但維垣論臣吃緊關目全在賍銀

四萬夫銀至四萬搬送必有多人送至家園
跋涉且數千里何人過付何人証見伏乞
皇上勅令維垣指實具奏 函下法司鞠訊明
白至于花獻宸等七案亦乞重 勅研審詳
覈卷案勘 臣 有無情弊如維垣疏語果真 職
當就大辟以正 國法如其不然恐說謊之
誅亦難以風聞解免也

天啓二年十月二十三日奉

聖旨已有旨了俟原奏到日該部院一併具覆

附詔獄述

塵容

對簿詞

某等六人同逮而某爲最苦彼五人死于鎮撫未到法司成招天下或有寃之者某旣送法司欲辯則奉

旨原是據招定罪豈容復辯以抗

聖旨欲不辯則自欺本心欺台臺卽是欺

皇上且欺天下後世况不但自証服而并借某以成五人之招此招一成某身名俱敗矣故

曰最苦也問與五人如何交結某曰楊爲常熟縣令因此相知左同年同鄉是以相知魏素極厚袁周蹤跡皆踈對簿詞止如此末云台臺能爲此案昭雪則萬代瞻仰在此一舉如其不然則有鎮撫原招在

獄中筆記五條

一人詔獄聲息俱遙聞不能覲面是即死也何天玉云在詔獄寫單索飲食于外譬如祖宗之顯靈家人送食傳單而進譬如子孫之祭

享非久困于獄者烏能描寫至此乎余入詔
獄百日而奉 旨暫發部者十日有此十日
之生并前之百日皆生矣何者與家人相見
前之遙聞者皆親証也余既叨此一百十日
之生視彼先逝者幸已甚矣復何憂哉復何
戀哉

一偶書一聯曰故作風波翻世道常留日月照
人心自志也

一詔獄所苦者五拶也夾也棍也杻也鐐也所

恥者五囚首不冠也膏藥貼指示傷也跣一
足亦示傷也彼高坐設罵叱咤也我蒲伏擎
跪也有此十者即無追贓之苦有倖生之路
丈夫猶不再辱况兼此二患乎

一詔獄土地廟前樹于六月間生一黃芝日夜
漸長至六人畢至時則燁然光彩遠映矣環
而視之適六辯獄卒皆詫或曰此吉兆也余
歎曰芝瑞物也而困于獄其不祥乎月餘獄
卒墮之

一余以五十死猶勝死者壽而無子者余以不
祥死猶勝死牖下而無聞者

獄中口授五條

一應山手藁二千餘言又謄真親筆一紙在孟
淑孔處

一應山血書二百八十字在所頭顏紫處

一應山桐城嘉善之死許顯純命收大監所頭
葉文仲同夕斃之顯純大賊分日上之應山
桐城復分時

一袁暗注大監實孤身在關廟顏紫手斃之

一周與予及孟三人共飯未畢郭鎖頭誘之見
官械送大監即刻斃之

大抵禁獄殺人非挺非刃非繩非藥不
知用何神術立刻就斃 乙丑九月初
八日口授大武弟

獄中自叙刑曹事六條

自天啓辛酉遼陽失後京師五城察院暨京營
科道日以捉奸細爲事及至送刑部其稍有影

響者大率論辟矣其絕無影響者可二百人司
官灼知其無辜則高閣置不問恐得罪原恭衙
門也已閱數印君矣及壬戌三月子署山東司
事查前之二百人者率皆以饑寒瘵死尚存五
十餘人予啓尚書王公曰以某一人之命易五
十人命某尚便宜况以一官易五十命耶王嗟
歎許之即日會同事者原雪之止留三人一則
自供甚悉不待刑訊一則雖非奸細乃假印人
也一則証佐未備餘悉開釋送大理評允而縱

之原叅臺省有怒于札者有怒于辭者有怒于
文移者予悉錄讞詞托人致之無不咋舌曰此
老吏之筆勿與競也予是以得免于叅論而臺
省視予爲畸人矣

兵部尚書行邊張鶴鳴奏杜茂佟卜年謀叛事
大率謂卜年爲河間知縣茂匿其衙中三月相
與謀叛乃遣茂同其大管家二管家往李永芳
處相約爲逆詞証甚具王尚書問合屬曰見杜
茂招否何如衆莫敢對予揖而言曰此只以原

招斷之可耳王曰尊意云何予曰兩人同謀叛
三箇月其情必親于骨肉矣以理言之尚當出
妻見子豈家人小廝名字尚不知耶今聞杜茂
在外審過五六次夾十餘棍矣問其大管家二
管家姓甚麼他終不曉豈茂果瘖瘡耶况同往
李永芳處往返數千里而不問一姓名尤可異
也王大笑司官中有欲下石者皆息家杜茂者
實陶登撫門下干摠給以千金使之募兵者也
茂頗浪費愧懼不敢復命乃匿于薊州一寺中

公...
被番役擒出誣以奸細其及卜年者蓋其得入
陶幕或卜年薦之也

壬戌七月初司審杜茂事畢王尚書問卜年當
得何罪山東司印君朱大典不能對予曰旣非
奸細然實是佟養貞族坐以叛族流二千里可
也王嗟服

七月十四日王以成佟招違限得嚴譴署部裏
者右侍郎楊東明也不問司官不會都察院大
理寺堂上官徑將原招自改于十六日上疏大

率謂卜年係奴酋族每歲拜金世宗墓宜誅予
同僚友潘永澄員外面折之曰此言何從得耶
楊曰聞之人言予曰刑部招但有審得云云未
嘗有聞得云云也疏已上本司朱大典員外尚
不知朱聞遑遽追而返之

七月十七日楊升堂畢揖合屬于法几前聚議
非故事也故事火房議事升堂作揖而已楊問
曰聞護熊廷弼者即護佟卜年者也其間機殼
何以相通老夫請問之諸公同僚三十餘人同

聲言二事各不相蒙無以仰對尊旨楊問不已
予揖而前楊曰公有所言耶予曰老先生所聞
非屬官所知安敢有言但老先生欲知此事機
穀張鳳臯老先生在城外折東一詢之足矣楊
語塞蓋此語即張教之折問屬官也值同僚汪
君詞氣過激楊乃語侵汪以自解而散

七月十八日楊未升堂在火房問合屬曰佟養
真前以謀反論則卜年非叛族乃反族也反族
常論斬予直前揖曰按律反族不同謀不同居

者止菘親論斬餘不坐楊作色曰謀反夷三族
何論菘親耶予和顏色對曰員外所執乃大明
律老先生所述乃漢律也同僚命吏簡律謀反
條呈楊楊無以難